

CUSSEGL GROND

Sessiun da zercladur 2023

Incumbensa Stiffler concernent l'analisa da la procedura d'admissiun per classas da talents

Dapi l'onn 2015 existan en il chantun quatter scolas da talents a Champfèr, Cuira, Tavau e Glion. Quellas pussibiliteschan a scolaras ed a scolars dal stgalim secundar I (scola reala e secundara) che han talents en ina disciplina da sport ed en musica, da frequentar la scola cun in urari ch'è adattà a las concurrenzas ed als trenaments.

Las classas da talent èn francadas en l'artitgel 38 da la Lescha da scola.

La finamira principala d'ina classa da talents è, che las scolaras ed ils scolars pon promover intensivamain lur talent ultra dal pensum da scola. Perquai che las plazzas èn limitadas, dovri ina tscherta procedura d'admissiun. La procedura d'admissiun actuala cumpiglia ina valitaziun dal potenzial (40 %), in test da la motorica da sport resp. in test musical (30 %) ed in test da la persunalitad (30 %). En differents cas ha questa procedura l'effect, che talents cumprovads na reusseschan betg a l'examen d'admissiun, uschia per exempel tar il test da la persunalitad. Per consequenza na vegnan els betg admiss a la scola ed il trenament intensiv, p.ex. sin il nivel dal sport da prestaziun, è uschia mo per part pussaivel a partir da la scola secundara u reala. Il sistem da l'examen d'admissiun na cuntanscha pia betg la finamira.

Dacurt è vegnì enconuscent, che la Regenza na vul – cun ina da las mesiras concernent l'examinaziun da las incumbensas e da las prestaziuns – betg pli ch'il chantun sez organiseschia la procedura per l'examen d'admissiun, mabain fixar mo anc las cundiziuns generalas per l'examen ed eventualmain survegliar la procedura en ina funcziun da controlla tras la gruppa directiva existenta. Suentar ch'ins ha rimnà experientschas durant circa 8 onns ed en vista ad in'eventuala delegaziun da las proceduras d'admissiun a las scolas da talents, èsi ussa pia uras d'analisar la procedura d'admissiun en las classas da talents.

Las sutsegnadras ed ils sutsegnaders incumbenseschan perquai la Regenza da far in'analisa davart las classas da talents, per exempel integrond la gruppa directiva, las scolas da talents, las federaziuns da sport e las organisaziuns da musica. En connex cun questa analisa duain vegnir examinads tranter auter l'examen d'admissiun sco tal, la valitaziun, la qualidad da las recumandaziuns da las federaziuns, il dumber d'admissiuns sco er eventuels ulteriurs aspects. A maun da criteris duai er vegnir mussà en questa analisa, per tge disciplinas da sport/musica che las classas da talents èn adattadas.

Claustra, ils 15 da zercladur 2023

Stiffler, Rabeth, Bergamin, Altmann, Bachmann, Bavier, Berther, Berweger, Biert, Binkert, Bleuler-Jenny, Censi, Claus, Cola Casaulta, Collenberg, Danuser (Cuira), Della Cà, Derungs, Dietrich, Epp, Föhn, Furger, Gansner, Gredig, Hartmann, Heini, Hoch, Hohl, Holzinger-Loretz, Jochum, Kappeler, Kocher, Lehner, Loi, Luzio, Maissen, Mani, Mazzetta, Michael (Castasegna), Natter, Pfäffli, Righetti, Rüegg, Said Bucher, Saratz Cazin, Sax, Schutz, von Ballmoos, Widmer, Wieland